

而塞漏卮此次北洋興辦工藝各事不過歲費十餘萬金且出自銅圓餘利並未動支正款而化游惰爲精良勵紳民使聯合此後逐漸擴充添助資本不獨惠及貧民實亦隱裨國計庶上以慰 聖主恤民之至意下以盡微臣守土之職司謹 奏奉 硃批著卽認真辦理務收實效欽此

直隸總督袁奏創設罪犯習藝所辦理情形摺

竊查前准刑部咨嗣後各省徒罪人犯毋庸發配概照所定年限收所習藝軍流人犯若爲常赦所得原者卽在本地收所習藝並以直隸向不安插軍流非常赦所不原免其解配軍流各犯應否卽在該省收所工作抑照定例發配應令體查情形奏明辦理等因臣因事屬創始不厭求詳節經督同司道悉心體查次第籌辦檢閱近年案卷直隸每年內外審結徒犯約有一百餘名軍流人犯除爲常赦所不原者仍照例發配外其常赦所得原者爲數無多自應與徒犯一體收所習藝以歸畫一至習藝所若按道分設直隸現有五道應設五所際此各庫空虛實難同時並舉惟有先就省城天津分設兩所以天津河間永平宣化四府遵化州並東西南北四路廳所屬及張家口獨石口多倫諾爾三廳之犯歸津所收留保定正定順德廣平大名五府易州趙州定州深州冀州五直隸州所屬之犯歸省所收留所內

員司夫役及解所各犯開辦第一年約共二百人上下兩年即倍其數雖一年之後徒犯逐有限滿而軍流各犯有自一年以至十年始行釋放者是以每所以能容四百人爲率兩所罪犯口糧開辦初年悉責成各廳州縣按缺分優劣分攤以後工藝獲有盈餘逐漸裁減其員司夫役薪水醫藥以及一應雜用暨成本各項津所則以育黎堂教養局原有經費充用不敷由賑撫局添撥省所因無善堂公款可撥由藩庫每年認籌撥付津所房屋係就教養局基址建造統共大小房屋二百四十一間廳屋二廠監所浴場醫室病室廚房廁所一應俱備惟津郡有巡警局罰充苦力人犯亦收所習藝故監所尙待擴充計共用工料銀二萬九千餘兩又油漆鋪陳並置備器具及員司夫役薪工暨一應開辦經費用銀三千兩先後由賑撫局照數撥給於上年六月間工竣開辦其省所房屋應就豐備倉擴充改建共擬建造及改修房屋二百一十六間規模悉照津所辦理實估工料銀一萬五千八百餘兩惟豐備倉前有工巡局設在其內現將該倉改建習藝所應蓋還工巡局房屋十餘間實估需銀一千八百兩亦經由賑撫局撥發銀二萬兩以資應用有餘則備員司夫役薪工之需業於上年十月間興工因冬冷春凍不便工作約須本年三四月間方可竣工至一應制度如建造房屋應合衛生之道而尤以便於防範管束爲要教導之法貴在寬嚴得當勸懲並施凡

此皆改良獄制之急務前經飭派天津府知府凌福彭赴日本考查獄制條陳東瀛成法極為詳備經天津道等參酌東西法制擬定章程條規並令省所仿照辦理其工藝一事擬令精粗並習天津爲通商地面似宜精美省城風氣未開先事粗淺而要在因才施教就地取材以易於銷售獲利較薄者爲最易現在津所開辦數月極形整齊成效可觀省所自當擇善而從至天津等府廳州屬罪犯應解所習藝者已飭自本年正月起一律辦理保定府等府州屬罪犯應俟省所工程告竣再行飭解據藩司楊士驥臬司寶棻天津道王仁寶天津巡警局道員趙秉鈞會詳請奏前來除咨刑部外理合會同兼管順天府府尹臣徐會澧順天府府尹臣沈瑜慶恭摺具陳再承德府屬罪犯習藝所應由熱河都統臣自行籌辦合併陳明謹 奏奉 硃批刑部知道欽此

署山東巡撫胡奏遵設罪犯習藝所酌擬辦法摺

竊照刑部奏定新章行令各省通設罪犯習藝所由督撫體察情形妥議具奏等因當經正任撫臣周馥分行司道轉飭各府州縣遵照籌辦去後旋據各府州縣稟經藩臬兩司彙核詳稱以東省一百四十州縣分隸於三巡道部章令於各道先設罪犯習藝所一區似不如逕由十府三直隸州各設工所安插本省外省遣軍流徒等犯免致擁擠惟建置房舍購備